



Tir Yimyim

www.tiryimim.in

Regd. No. RNI. NAGAAO/2004/13113. Postal-NE/RN-717.

e-mail : tiryimim@gmail.com

TAPAK 7

Yangia anidakangma :

f Tir Yimyim

Instagram tiryimim@aolima

YouTube tir yimyim

TAPAK 10

Sonia Gandhi lenisüba nung tamang kateter

Nagaland-i SACCC aser SAAF Cross Country Championship ayongzüksü



VOL. XIX NO. 08 (ADOK 08)

DIMAPUR

KÜPTOKNÜ (SATURDAY)

MONGPUTENI (OCTOBER) 16, 2021

₹ 5.00

Naga Hoho indang Federal Assembly senden amen

Dimapur, October 15, 2021 (TYO): October 15, 2021 nü Naga Hoho (2019-2023) indang mezüngbuba Federal Assembly menogo.

Dimapur nung aliba Hotel Saramati Conference Hall nung Naga Hoho nung unit balala aser Arunachal Pradesh, Assam, Manipur, Nagaland o Myanmar nungi teshimtet nisungtem aden.

"Naga Hoho-i Naga Movement aser putiotsü temetentem tamendakdak nung noktaka lir. Naga nung ka dang aser asenok tejakleni aotsü atema Naga kibong tsüingda olemtepa longjemtsüla. Anungji tanü Federal Assembly senden nung August 3, 2015 Framework Agreement nung ajemdaker Indo-Naga latettsü atema inyaksü bangzüngogo" ta Speaker, F/A Moatemjen Emchen aser Secretary, F/A Toniho Sheqi nati sangdong ka nung ashi.

Tanü senden nungsa Naga Hoho akangshitsü bangzüngtepa aser Naga Hoho nungi pilaa aoba unit tem den jembishiniä, parnok telemtetbatem meyipa reprangshitsü lemtet.

Assam nung aliba Naga

nunger melemsadaksütsü atema Assam sorkar dang mepishitsü lemtet. Iba ya Karbi Peace Accord sign asüba sülen Rengma Hills dak rangloker jembi.

Arunachal Pradesh kübok Tirap, Changlang aser Longding nung Naga nung alemlü nungi liyonga arur. Anungji Naga Hoho indang Federal Assembly-i Arunachal Pradesh sorkari Tirap, Changlang aser Longding district nung kin balala nungi 'Naga' agienba magizüker ta lemtet.

Naga Hoho-isa Naga nung teresem ajak nungi Armed Forces Special Powers Act (AFSPA) 1958 agientsü atema takhangba agütsütsü lemtet.

Federal Assembly senden nungsa Naga Hoho indang Executive Council nem Political Affairs Committee tanaben tentettsü tashi agütsü, ta Speaker aser Secretary natisa ashi.

Iba sentong nung Rev. L. Kari Longchar-i temoatsü meshia sarasademtsüba aser Lotha Public Organisation (LPO) o Sumi Aphuyemi Hoho, Pughoboto-i Federal Assembly nung adenba atema pelar, ta Maotemjen aser Toniho natisa metetdaksü.

Assam nung tesayur ka kaketshir tsüingdang apudakdaksü

Guwahati, October 15, 2021 (Agencies): Tinsukia district kübok Philobari nung kaketshir lennirtemi school tesayur ka kaketshirtem tsüingdang apudakdaksüba sülen AASU-i district lennir ka anentsüogo.

Iba tatalokba indang video ka social media nung kanga prokshir aser All Assam Students' Union (AASU) lennirtemi shilem agiba atema nisungtemi aitsür.

Iba ya October 11 nü atalok aser social media nung kanga prokshir. School fee ajungketba atema tesayur nem kaketshirtem tsüingdang apudakdaksü.

District-level AASU lennir kati anir nisung telok kati Philobari Senior Secondary School principal Nirada Bora nem gari lenmang nung lar kaketshirtem tsüingdang apudakdaksüba video nung menüngoka lir.

"AASU lennirji Karna Buragohain ta jangjaogo aser pa anentsüogo. Iba tatalokba atema kanga sasar aser tatok meshir" ta AASU general secretary Sankar Jyoti Baruah-i ashi.

"Onoki iba tatalokba bushisüingdanga aodang AASU lennir Karna Buragohain-i shilem agiba bushitet. Onoki pa AASU nungi anentsüogo" ta pai ashi.

Nisungtemi social media nung aitsüba sülen Philobari nung lokti

tentet balala nungi lennirtemi tesayur Nirada Bora'er kidangi o la dang tatok meshia liasü.

Principal Nirada Bora nem lar kaketshir tsüingdang apudakdaksüba kaketshir lennir teimba ka taoba mapang lar kaketshirtem liasü.

Tinsukia Zila Saikhik Karmachari Manch (teachers-employees' body)-ia iba tatalokba aitsüogo aser tarutsü nung iba ama mapa meinyaksü mepishia metetdaksüogo.

Külen, Tinsukia district administration-ia Magistrate-level nung bushisüingdang asütsü tetuyuba agütsüogo.

Honibarnü public-ia iba onük jembitsü atema lokti senden ka ayongzüka lir.

Aluyimertemi PM Modi, Amit Shah nunger mesüka yanglur rongdok

Jaipur, October 15, 2021 (Agencies): Hokolbarnü Dussehra amongdang Samyukt Kisan Morcha (SKM)-i Prime Minister Narendra Modi, Home Minister Amit Shah aser tangartem tejak aika aliba Ravana mesüka yanglur rongdok.

Iba nung Modi aser Shah na tejak den RSS chairman Mohan Bhagwat, UP Chief Minister

Taoba minister Kihoto Hollohon alima nungi pilaogo



Dimapur, October 15, 2021 (TYO): Hokolbarnep 6:00 ako meta Dimapur mozü ki ka nung ex-minister Kihoto Hollohon alima nungi pilaa ao.

Pa arishi küm 91 liasü aser pai kinungtsü, jala 3 aser jabaso ka den semchirtem toktsür asü.

K Hollohon-i general assembly election 7 ben toktepa takok angu. 2008 - 2013 kümsük tashi pai Nagaland Legislative Assembly nung züngsem inyakba sülen politics nungi anena liasü.

K Hollohon ya Sukhalu Government School nung azüng aser iba sülen Shillong nung Class VIII azüng. 1948 küm

pa Naga National Council (Naga Movement) nung co-member ka

züngsema liasü aser asür A.Z. Phizo den ajurutepeba sülen Naga nüjiso atema inyakba mapa nung kanga bendanga agüja tenzü.

October 20, 1962 nung pa aser pa den külem züngsem 257 tashi temai adok. Iba sülen pa Nagaland Armed Police nung Inspector inyaksü tenzü saka 1966 nung iba mapa nungi anen.

Pai lokti atema inyaka arudang tenla ki aser prayer house aika yanglutsü. Paisa kin mesüra state kecha telemsa melii missionary aika yariogo. 2019 nungi pa tasoyim Khukishe aser Daniel Village nung pai Head GB ama inyaka tarudak nung pa asü.

K Hollohon-isa NNO Party president, Zunheboto Sadar, 1967 Joint Secretary, UDF Party

(taoba UFN), Nagaland, aser Satoi-Tokiye Area nung Regional Council Member (RCM) inyaka liasü.

1977 küm pai Aghunato Assembly Constituency nungi general elections nung toktepa 4 buba Nagaland Legislative Assembly nung züngsem aküm.

1982 küm pa kasa constituency nungi takok angu aser Excise Minister inyak (attached to the Chief Minister). 1987 nunga Aghunato A/C nungi pai takok angu.

1989 nung pai Dimapur III A/C nungi toktepa takok angu aser Food & Civil Supplies Cabinet Minister inyak.

1993 küm pai Dimapur III A/C nungisa takok angu aser Industries & Commerce Cabinet Minister inyak.

1998 küm 'Solution, Not Election' tayongzükbaga angaa pai general assembly elections nung shilem magitsü telemtetba agia liasü.

2003 küm K Hollohon-i Dimapur III A/C nungi takok angu aser Social Security and Welfare Cabinet Minister inyak. 2004 küm ministry ilashiba mapang pa Social Security and Welfare nung Parliamentary Secretary ama shimshia liasü.

2008 küm pai Ghaspani II A/C nungi toktepa takok angu aser MLA ama inyak.

COVID-19 Nagaland: 31 dak putet, 28 taneptsü angu & 1 asü

Kohima, October 15, 2021 (TYO): Nagaland nung Hokolbarnü nisung 31 dak COVID-19 putet aser nisung ka asü.

"Tesüiba ghonda 24 tsüingda nisung 31 dak COVID-19 putet. Parnokji Dimapur nung 21, Kohima nung 5, Peren nung 4 aser Mokochung nung 1 lir" ta Integrated Disease Surveillance Project atema State Nodal Officer, Dr Nyanthung Kikon-isa ashi.

"Kasa mapang COVID-19 puteta alir nisung 28 taneptsü angu. Parnokji Dimapur nung 20, Kohima nung 6 aser Kiphire o Phek nung kaka (1) lir" ta paisa ashi.

Nisung 31,547 rongnungi

29,625 tashi taneptsü nguogo aser ibaji 93.90% lir, ta Dr Kikon-isa ashi.

Tang nisung 228 anepaludar saka parnok 161 dakbo shirangba yimya kecha mali, ta paisa shisem.

"Hokolbarnü Kohima nung COVID-19 puteta alir ka asü aser iba nisung züngsema tasür ajak agi 674 kümogo" ta Dr Kikon-isa metetdaksü.

"Nagaland nung COVID-19 alitsü akok ta temolung melemlü bilemba sample 385,309 tendang. RT-PCR ajanga 110,263, TrueNat ajanga 84,444 aser Rapid Antigen Test ajanga 190,602 tendang" ta Dr Kikon-isa ashi.

"Brihostibar tashi nung nisung 700,411 nem COVID-19 vaccine indang dose 11,33,009 agütsüogo" ta State Immunization Officer, Dr Ritu Thurr-isa ashi.

"Vaccine agirtem rongnung frontline workers 60,945, healthcare workers 15,998, arishi küm 45 ser temapur 200,454 aser arishi küm 18 nungi 44 tsüingda alir 423,014 lir" ta paisa ashi.

"Vaccine agirtem rongnungi nisung 432,598-i dose anaprong agiogo. Parnokji frontline workers 47,701, healthcare workers 13,327, arishi küm 45 ser temapur 149,873 aser arishi küm 18 nungi 44 tsüingda alir 221,697 lir" ta Dr Thurr-isa ashi.

Yogi Adityanath, Haryana CM Manohar Lal Khattar aser shishilembar Mukesh Ambani o Gautam Adani nunger tejak dena liasü.

Iba nungsa "Ni Narendra Damodardas Modi lir, Ni aluyimertem anema noktaker" ta Hindi oshi nung zülua liasü.

Tanü Swami Kumaranand Bhawan nung aluyimertem adenshi aser iba sülen Shaheed

Smarak tsütsü PM Modi o tangartem anema yimyim ayiam ao. Lakhimpur Kheri, UP nung ozüng alema mapa inyakba aser Centre-i Farm laws yangluba anema parnokii yimyim ayim.

"Tajungi temenen madak takok anguba benjung tanüla tangatetba nung onoki BJP, RSS, PM Narendra Modi aser tangartem temenen ta sayua

rongdokogo. Centre sorkari democracy tesayubatem ajak amaogo aser shishilembar kar ajangzükdaksütsü aser aluyimertem anema inyaker" ta Samyukt Kisan Morcha, state joint secretary Sanjay Madhavi ashi.

Morcha-i linük ajungalen amongtsü ayongba ama onoki iba sentong agi, ta Madhav-isa ashi.



Tanabuba Yajen Aier Award agütsüba sentong tanü Asetkong Mungdang Senden Salang, Kobulong nung agiogo, kong kaketshir tenet nem tetushi agüja liasü. Iba sentong nung Temsuchuba Jamir, SDO(C) Mokokchung alakteta jaoker liasü. Yajen Aier Award 2021 agizükertem rongnung NBSE/HSLC Toppers Tiamongba Aier, Ochien aser Wangshirenla aser NBSE/HSSLC (Arts) Topper Chubatola nung densema liasü. Maneni Asetkong kübok aliba school tem nungi takok tajung anguba kaketshirtem nema tetushi agütsüogo. Iba tetushi ya CMHSS Impur nung azünger Lensen Ozukum, Class 8, CMHSS Impur nung azünger Temsuyanger Class 9 aser Yajen Aier GHS Mopungchuket nung azünger Sentisang Class 10 nungeri agizüka liasü. Asetkong Mungdang-isa, taruba küm nungi subject toppers aser parnok tesayurtem nem tetushi agütsütsü.

NBSE-i Vidyarthi Vigyan Manthan atema metetdaksür

Dimapur, Mongputeni/ October 15, 2021 (TYO): September 27, 2021 nü sangdong ka ajanga metetdaksüba osang nung anidaka, tanaben Nagaland Board of School Education-i, register ser alir reju ajak dang Vidyarthi Vigyan Manthan, koba India indang Science Talent Search Examination tulutiba asütsü, 2021-22 atema iba tatidang India tesem ajunga nung November 30, 2021 mesüra December 05, 2021 anongo anepdang 10:00 nungi aonung 8:00 ako tsüngda mapang mashi ka nung minute 90 shi ayonga agütsü, ta metetdaksü.

Iba National sentong tulu nung Class VI nungi class XI tashi azünger kaketshirtem shilem agidaksütsü atema tesayurtem pei pei reju nung kaketshirtem ajungshitsü asoshi

mepishir.

Science tesayurtem, shirnoki October 01, 2021 nü orientation senden (Zoom Meet) nung shilem agiogo, kaketshirtemi iba tatidang nung shilem agütsü asoshi item tesayuri kaketshirtem dang tim tesayuba agüja aser parnok ajungmesotsü imlar. Iba tatidang atema kaketshirtemi October 31, 2021 tashi nung züngoksemsüla aser tesayurtemi kaketshirtem dang iba osang agütsütsü mepishir. Züngoksema aliba kaketshirtemi iba tatidang atema renemshitsü asoshi 'study material' tem download sütetsü aser November 1, 2021 nü mock test agütsü renema lir.

Maneni, taoba mapang sangdong ajanga metetdaksüba ama, VVM ya India indang mezüng app based Open Book Examination lir. Züngoksema aliba kaketshirtemi pei pei

kidang nungi device tem talisa smartphone, laptop mesüra desktop amshia iba tatidang agütsütsü akok.

School level, District level aser State level nung takok angur kaketshirtem nem participation/ merit certificate agütsütsü. Zonal level nung takok angur (kaketshir 72) aser National level nung takok angur, koba Himalayans ajar (kaketshir 18), parnok ajak linük indang nungtugu R&D labs nung Internship-cum-Extensive Training Programme (SRIJAN) nung adentsü asoshi maongka angutsü. National level nung takok angurtem nem (Himalayans) Bhaskara Scholarships agütsütsü renema lir.

Iba tatidang dak sendakba nung, kaketshirtem registration aser osang tejangja agütsü atema www.vvm.org.in website nung tongteprateptsü akok, ta kasa sangdong nung shia lir.

JANGJASHITSÜR

October 14, 2021 Tir Yimyim adok tapak 9 nung "Asst Professors mapa atema..." ta agütsüba osang nung "Assistant Professor inyaksü atema PhD degree 2023 tashibo menüngdaksü. University nung Assistant Professor inyaksü atema PhD degree agütsü ta liasüba Covid wara aliba agi 2023 July ita tashi magii atatsü UGC-i lemtetogo" ta jangjashitsür.

Nagaland Anghaser CPO-i asükhu lemsatep

Dimapur, Mongputeni/ October 15 (Agencies): October 13 nü Kohima nung taoba minister Lhiweshelo Mero asüba osang angazüka mang ayimba Nagaland Angh Prof. Jagdish Mukhi-i sangdong ka ajanga lemsatepogo.

Asür Lhiweshelo Mero ya tarutsü atema bilema inyakba lenir ka liasü, shiba tia tensa ajak nung Nagaland yimji yimjung atema anibelem mesasai inyakogo. Pai lenla balala nung Naga nung atema mapa tajung inyakbatem teti bilemtetsü.

Pa asüba ya Nagaland nung aliba nüburtem atema takoksa kanga tulu. Ni Nagaland nung aliba nüburtem aser kü tenüng nung asür kinungertem den asükhu lemsateper aser Tsüngremi asür kinungertem nem mangyim jashi khuret koktetsü atema anisüngzüak agüjang ta sarasademtsür. Pa

tanüla teti tatem makadak anisüngzükdakjang, ta Angh-isa lemsatep.

Kasa mapang nung Chakhesang Public Organisation (CPO)-ia Lhiweshelo Mero asüba osang angazüka mang ayimba lemsatepogo, shiba October 13 nü Bethel Hospital, Kohima nung asü.

Pa asüba ya Chakhesang nungertem atema takoksa kanga tulu, shibai lenir ka ama tanur tain ajaki angazüka benshitsuata tatishitsü tajung sayuogo.

Pai lokti atema inyakba aser terenlok mapa balala inyakba tushitsü langa lir aser teti bilemtetsü, ta CPO-isa ashi.

Maneni CPO-i asür kinungertem den asükhu lemsateper, ta tir Mikha Kenye aser General Secretary Veduvo Rhakho nati külem sangdong ka ajanga metetdaksü.

Gol ketdangsür aser WC, NNPGs ajurutep

Dimapur, Mongputeni/ October 15 (TYO): Naga nung ken o sensak asemtsü atema Government of India (GoI) representative A. K Mishra aser WC, NNPG tem New Delhi nung October 14 nü ajurutepogo.

Taoba GoI interlocutor N Ravi-i maparen balala inyaker

toktsüba dak ajemdaker telok ana tsüngda tangatetep nung sensaksemogo.

Maneni tesendaktep tajungba küma yanglushitsü atema tarutsü nunga sensaksem tali akatsü, ta WC, NNPGs media cell sangdong ka ajanga metetdaksü.

Kija aser lokti tentet balalai asür Hollohon den asükhu lemsatep

Dimapur, Mongputeni/ October 15 (TYO): CM Neiphiu Rio-i sangdong ka ajanga October 15 nü taoba mapang Nagaland sorkar kübok minister K Hollohon asüba osang angazüka mang ayimba lemsatepogo. Pa arishi küm 89buba nung tanü Olive Hospital, Dimapur nung asü.

Asür Hollohon ya Nagaland Police nung Inspector ka liasü saka iba mapa toktsür yimden yimsüsüba nung tetsüng ajemok. Pai Nagaland Legislative Assembly constituency asem tenüng nung nokdakogo. Pa Aghunato -34 A/C nungi asemnen aser Dimapur -III A/C aser Ghaspani -U A/C nungi khen khen shima liasü. Pa election nung toktepa mapang khen danga tamakok mangu.

Pa yimden yimsüsüba nungi anenba sülen Arogo maparen balala nung shilem agi, aser mapa tajung aika inyaka toktsüogo.

"Pa kanga tasü tait, teyariniü

aser tashi tait lenir ka liasü. Ni pa meteter küm aika süiogo aser sorkar balala kübok pa den külemi inyakogo. Pai nüburtem atema mapa tajung inyaksübatem teti bilemtetsü," ta CM-isa ashi.

Sumi kin aser Naga nungertem asoshi tanü tebedi ka iba lima nungi pilaogo. Pai den tepila salem lemsatepba mapang pai inyaka toktsüba mapa tajung agi asenok mulung süngdaksüdi, Rio-i ashi.

"Ozü kibongi asür kinungertem den asükhu lemsateper. Tulusang Tsüngremi parnok nem mangyim jashi khuret koktetsü atema anisüngzüak aser tashi agütsütsü sarasademja atar. Pa tanüla teti tatem makadak anisüngzükdakjang," ta CM Rio-i kasa sangdong ajanga lemsatep.

Kasa mapang nung NPP, Nagaland State-ia Kihoto Hollohon asüba osang angazüka mang ayimba lemsatepogo.

K. Hollohon ya 1932 küm April ita Zunheboto district kübok Khukishe yimtsüng nung aso. Pa 1968 küm Zunheboto sadar tir liasü aser UDF aser UDF central committee indang secretary liasü.

Asür K. Hollohon ya 1977 küm nungi 2013 küm tashi nung election nung tenetben tashi takok angu aser khen danga tamakok ngua mali. Pai State Minister of Excise attached to the CM, Minister for Food & Civil Supplies, Minister for Industries & Commerce aser Parliamentary Secretary, Social Security & Welfare minister mapa benogo. Pa asüba mapang nung pa SBAK, SABAK aser WSBK aser Nagaland kübok Arogo 33 den sendaka liasü.

Pa asüba ya Nagaland aser talisa Sumi nungertem atema takoksa kanga tulu. Lokti lenir ka ama pai tamangba yimsü ajak, lokti aser kin ajungkettsü atema takok tashi inyakogo.

Tang amala mangyim jashi

tia nung aliba mapang NPP Nagaland State-i asür kinungertem den asükhu lemsateper. Tulusangtsüngremi iba mangyim jashi koktetsü atema asür kinungertem nem tashi agüjang ta sarasademtsür. Pa tanüla teti tatem makadak anisüngzükdakjang, ta NPP, Nagaland State tir Dr. Andrew Ahoto Sema-i sangdong ka ajanga lemsatep.

Maneni NDPP tir Chingwang Konyak-ia, Kihoto Hollohon mapang talangka shiranga liyar tanep asüba osang angazüka temlung koremba lemsatepogo.

"Pa 1980 küm Indian National Congress nung adenba sülen ni pa den inyaka aruogo aser küna tesendaktep tajung liasü. Pa kanga nisung tajung aser nüburtem yaritsü atema teti renema aliba nisung ka liasü. Pa tangatetbaji pai akokba tashi nüburtem anisüngzüka toktsütsü atema liasü," ta Chingwang-isa ashi. NDPP kübok tulu tilanati asür

kinungertem den asükhu lemsateper aser tulusang Tsüngremi temlung zürep aser tejashi koktetsü atema tashi agüjang ta sarasademtsür. Asür tanüla teti tatem makadak anisüngzükdangjang ta sarasademtsüba, paisa lemsatep.

Asür Ex-Minister K. Hollohon asüba osang angazüka NPCC-ia, kinungtsü Hozheli Hollohon, chirnur aser semchisemnurtem den asükhu lemsatepogo.

K. Hollohon ya tashi tait lenir ka aser pa tamangba nungi masetshiba nisung ka liasü. Pa temlung kanga tulu aser pai nüburtem kecha matidaki yariogo. Pai nüburtem kümzüka ayutsü aser temeden agütsütsü atema kinyakba teti bilemtetsü.

NPCC kübok telen ajaki asür kinungertem den asükhu lemsateper aser tulusang Tsüngremi asür kinungertem nem anisüngzüak agüjang ta sarasademtsüba, kasa sangdong ajanga metetdaksü.

DSGMC-i Meghalaya Governor dang teyari meshir



Shillong, October 15, 2021 (Agencies): Delhi Sikh Gurdwara Management Committee (DSGMC)-i Meghalaya Governor Satya Pal Malik dang Harijan Colony (Punjabi Lane) nungi Dalit Sikh nung anientsü onük atema mapa inyaksü mepishiogo.

Meghalaya sorkari high-level committee (HLC) ajanga ashiba nung ajemdaker Harijan Colony nung aliba Sikh nung tangaleni anientsü lemtetba sülen DCGMC-i Governor dang teyari meshi.

Governor Malik-i iba onük atema tebang aitsü aser mapang talangka nungi iba tesem nung

lia arurtem aser Harijan nung nem teyari agüjang ta DSGMC-i mepishi.

State sorkari Harijan Colony nung alirtem anienba mapa inyakba anema ken o benokba ajanga okadak jembitsü ta Meghalaya chief minister Conrad Sangma-i shiogo.

Külen, Harijan Panchayat Committee (HPC)-i high-level committee (HLC) osang magizüker aser küm 200 tejakdang Myllem nung Syiem ajanga ali tenla agütsüba Sikh nung kibong 250 indang lir ta ashir.

Harijan Panchayat Committee (HPC) yagi Harijan

Colony (Punjabi Lane) nung aliba Dalit Sikh nung atema noktaker aser parnoki Meghalaya nung BJP-i aniba sorkar anema tatem tashi noktaksü ta metetdaksüogo.

"Land mafia-i rongshiba ajanga Sikh nung sensakertem timtemdaksür. Taoba mapang iba ali nung nisung meliteti liasü saka tangbo kimung tajung kümogo" ta HPC president Gurjit Singh-i ashi.

Ali acre 2.5 indag colony ya küm 200 tejakdang Punjab nungi arurtem indang lir. 1863 matongdang Khasi nung kin tanishir kati iba ali tenla agütsü, ta HPC-isa ashir.

Meghalaya by-election nung NPP nem vote tagütsü: HNLC

Shillong, October 15, 2021 (Agencies): Meghalaya nung ozüangi noktanga aliba Hynñiewtrep National Liberation Council (HNLC)-i National People's Party (NPP) nem vote magütsütsü tetuyuba agütsüogo.

October 30 nü Meghalaya nung assembly menden 3 atema by-election agitsü lir.

HNLC-isa NPP dang hopta ka tsüngda Khasi aser Jaiñtia

Hills region nung office ajak shibangtsü mapang atakzüksüogo.

"Cherish Thangkhiew khasetba atema tejashi sayua onoki nübertem dang by-election nung NPP nem vote meinoktsütsü ayongzükur" ta HNLC general secretary Saiñkumar Nongtraw-i ashi.

Thangkhiew ya taoba mapang HNLC general secretary liasü aser August 13

nü Shillong nung par kidang lia police-i khaset.

"National party tem ya rainbow coalition ama dang lir aser parnoki Meghalaya state-i ajuruba khuretem memetet" ta Saiñkumar Nongtraw-isa metetdaksü.

"Anungji, asen nübertemi aginübatem mapa kuma inyaksütsüpur regional party tem nungdaker" ta Nongtraw-isa shisem.

BRO-i Arunachal tunnel yanglutsü pokdok

Guwahati, October 15, 2021 (Agencies): Border Roads Organisation (BRO)-i Arunachal Pradesh nung Sela Tunnel Project yangluba nung tongtipang mapa ka inyakogo.

Tawang nung tziyüm nungi kilometer 13,000 temalen ajungketa yangluba kilometer

1.5 talang tunnel ya 42 Border Roads Task Force (BRTF)-i yanglur.

Prime Minister Narendra Modi-i February 2019 küm iba tunnel yanglutsü atema lung azüngtsü.

Iba mapatong nung tunnels ana lir aser kilometer 9 talang

approach roads dena lir.

"Covid ajanga tenokdangbatem liaka mapatong tekaratiba nung inyak" ta BRO-isa ashi.

Iba mapatong ya Rs 687 crore endoka yanglutsü aser taruba küm asem tsüngda renemtsü.



Manipur kübok Churachandpur district nung Maj Gen Alok Naresh, IG, Assam Rifles (South)-i skill development centre ka lapoktsüdang agiba noksa angur. Telungpurtem khuret aliba district nung SoO (Suspension of Operations) züngsemtem tashi itdaksütsü aser teyari agütsütsü atema SoO camp ka nung skill development centre ya lapok. (Churachandpur, October 15)

Centre-i Gauhati HC nung judge 8 shimer

Guwahati, October 15, 2021(Agencies): Centre sorkari Gauhati High Court nung judge 8 tashi shimba osang metetdaksüogo.

Gauhati High Court nung judge inyaksü atema advocate Kakheto Sema aser advocate Devashis Baruah, aser judicial officers- Malasri Nandi, Marli Vankung aser Arun Dev Choudhury nung shim.

Gauhati High Court nungsa Soumitra Saikia, Parthivjyoti Saikia aser S. Hukato Swu nung additional judges inyaksü shim.

India President-i Chief Justice of India den asüngtepa Allahabad High Court, Madras High Court aser Gauhati High Court nung advocates aser judicial officers shima liasü.

Tripura nung aliba Bru nung nem by-election nung shilem magidaksütsü: YMA

Aizawl, October 14, 2021 (Agencies): October 30 nü Tuirial Assembly constituency indang by-election nung Tripura nung aliba Bru nung nem shilem magidaksütsü ta Mizoram nung Young Mizo Association (YMA)-i metetdaksü.

"Taruba by-election nung nung Bru nung voter tem asoshi polling booth balaka lapoktsütsü ta asüba onoki magizüker. Ajisüaka, parnok Mizoram nung arua pei pei polling station nung vote agütsüra agizüksü" ta YMA president Vanlalruata-i ashi.

Mizoram nungi aoba Bru nung 663-i Tuirial assembly constituency by-election nung vote agütsütsü temsüa lir.

Bru nungertemji Mizoram nung masük kechiyong parnok meyipa maru, ta paisa ashi.

Vanlalruata-isa Election Commission dang Tripura nung aliba Bru nung voter tem Mizoram electoral rolls nungi agientsü takhangba agütsü.

Taoba mapang Mizoram-Tripura arrtsülen Bru nung atema voting booths balaka lapok.



Guwahati nung tekülemertemi Durga süngyanglutem tzü nung enoktsüba sülen puja pandal nung Durga Dashami amongba angur. COVID19 wara liaka puja pandal ajak nung nisung aika adenshia mongogo. (Guwahati, October 15)

Assam CM-i BSF telongtet ulushiba pelaa agizüker

Guwahati, October 15, 2021 (Agencies): Centre-i Border Security Force (BSF) telongtet ulushiba pelaa agizüker ta Assam chief minister Himanta Biswa Sarma-i metetdaksüogo.

"Iba ajanga linük security aser arrtsü kümzüka ayutsü" ta CM Sarma-i ashi.

"Assam-i BSF indang telongtet ulushiba pelaa agizüker. State police den arrtsü adena shibelenba aser ozüing alema nisungtem aruba noktangtetsü" ta paisa ashi.

Border Security Force (BSF)-i tang nungi Assam aser West Bengal nung arrtsü telongtet kilometre 50 nung mapa inyaksü tashi angur.

Tawa drone amshia prangpong-injangtem yokba ajanga Bangladesh aser Pakistan den arrtsüa aliba state asem nung BSF indang telongtet ulushitsür ta Union Home ministry-i ashi.

Border Security Force Act, 1968 nung Section 139 ajanga Centre-i mapang shia BSF indang telongtet ulushitsür.

Manipur, Mizoram, Nagaland, Tripura aser Meghalaya aser ano J&K aser Ladakh UTs nung, aser Gujarat, Rajasthan, Punjab, Bengal o Assam nung kilometer 50 telongtet nung BSF-i Passport Act, NDPS Act, Customs Act aser Criminal Procedure Code (CrPC) mapa inyaksü.



TIR YIMYIM

YIMOBILEM (EDITORIAL)

DIMAPUR

KÜPTOKNÜ

MONGPUTENI 16, 2021

Asenokia temeyongbo küraktsüla

Nagaland nung nübortem meimba agi senso tajung aikati parnok nübo aser rongsen tenla agüja department tapu balala nung "Right to Information Act" tashi amshia nübortem asoshi terenlok mapatem inyakba senotsütem shitak amshia ali mali bushisüingdanga kaktetter nübortem nem yimjak nung metetdaksür. Iba mapa ya pei asoshi tajangzük aliba jangratemtsü mapa kabo masü saka yangi lendong aser nüngsen lir. Manipur nungbo RTI tashi amshia government-i nübortem asoshi terenlok mapatem inyakba indang bushisüingdangertem pei kidanga melitet jenshia senzüba otsü asenoki angashir. Iba tashiji pei taküm agi tendanga RTI tashi amshia asenok asoshi inyaktsürtemi asenok alidak asenok tenung nung mapabo meinyak ser sen agizüka achiba osangtem yimjak nung metetdaksüaka, asenokibo koka masür, tenaronga marepzür aser temeyonga meküraker. Asenok yabo kari tamachitsü mozü kar chidaksür tepchi kümdaksü amai kümogo. Tanü Nagaland nung nübortem tia ajung, RTI tashi amshia department balala nung government ketdangsertemi mapa shitak amshia nübortem yarir asü meyarir ta bushisüingdanga inyaktsür Wb. S.T. Yapang Longkumer o Wb. Odi Jamir na lir. Mapang mapang shia tenati asen lima nung government-i nübortem asoshi shitak meinyaktsüba mapatem bushiteta metetdaksür. Aji oda, tawaa state government kübok yimtsüing aser town aika nung nübortem asoshi kiojen yangluba, ango tzübo yanglutsüba, aluyimba aser chiyongsü yangluba mapatem asoshi senotsübo agizüka agi saka mapa inyakba mongbo maka ta asüba osang tejangja parnoki metetdaksüogo. Parnoki RTI ajanga bushiteta osang nungji kong aser kechi mapa atema shiba tenung nung sen kwi agizüka agiar, item ajakji tejangja shia lir. Iba amaji pei alidak nisung kari yimkong ajangzüktsüba mapa inyakba tenung nung senbo agizüka agi, saka mapabo meinyak ta asüba osang tejangja bushiteta bener arua metetdakjaka, yimten aser lokti tentetemi tangashia mangashi aser tangua mangu ama toktsüra, iba jagi ano maneni iba ama tiyazü mapa inyakba tenung nung asen yimtak aser asen town nung takokeribo akok tashi inyakang ta ajungshiba den kasa asütsü. Iba jagi nija ki ka anabo tajung yanglutetsüa akok saka yimbo arem akümtsü. Delhi nungi senbo teimba teimba yoker saka Nagaland-bo tekongraba tekongraba akümer ta asüba kuliji tanü asenok dang RTI tashi amshia inyakertemi bushiteta sayuba kulitem ya lir. Aji oda, kena tebushitsür dang lira aser bushiteta dang bener arutsüra, tanüngba mapajibo tebushitsütetertem mapa masü saka nübortem mapa asütsüla. Tanga lima nungbo osangkaket nung osangbener kati tesem ka nung nübortem anema ochimashi inyakba osang züpeta danga zülutsü nung, iba osang nungji amendaker nübortemi tatem tashi bushir. Ajisüaka, asen limabo aser asenokbo yamaji masü, mauyar aser mapa meinyak ser sen agizüka magir akoksa. Kena meyiper asenokbo mapa meinyak ser sen agizüka takar akümertem dang nüksahir aser tushia amshir. Mapa meinyak ser sen agizüka chitetba aser mapa meinyak ser asenok tenung nung sen agizüka agiogo tabo metet saka ola madokba nübortemji tajung tazü masü, matu malem, teti tangari mezüingmeshitsüba purtem lir. Item ajakji asenok azümasenba nungi adoker. Asenok oshi nung kecha meinyaknü, azümasenertem dang temeyonga meküraknertem ta ajar. Mapa aika nung asenokbo kimdong alema maotsü, mapa kecha mebulutsü, asentzü alua kenyonji mejajatsü, nükenbelema masütsü, telalua kecha melalutsü aser nüngsen kecha magitsü saka tangar nungiang ajak imlatsü ta asüba azümasen jakla asenok dak keta lir. Tangar-tangar dang jajadaksütsü aser jembidaksütsü saka asenokbo temeyonga mekürak kidang moka kazütsü ta asüba kolokji alar kolok aser jaklaji azümasen jakla lir. Iba kolok aser jakla adenba agi asenok madak ketdangsertemi asenok meima aser akümtsübu amshitsü melen, asenok mezüingmeshir aser asenok melen teinyaka parnoki inyaker aser tachia parnoki achir. Asenokbo teinyaka meinyaker aser tagia magir. Aji oda, temeyonga meküraker, anungji tebang nungi ola kata madoktetter. Iba tia nung asenoki repranga lia asen tenung nung asen alidak tangari mapa meinyak ser sen agizüka takar küma sayur. Asenoki asen meiyong küraka mapa meinyak tashi aser tebanglen nungi tasü itta ochimashi anema ochi o madok tashi, tangari yamaji tenük beleper mesüshi manentsü.

OLEMSABANG

Co-Pastors Inyakyim

Narola McFayden

Okila

Iba oset ajanga arogo nung toklang tenzükba, asen lima meinyakba, inyakyim tasen ka indang lemsateptsü Yanglushidi Sensaksem Sabang (YSS) nung maangka agütsüba asoshi kanga pelar. Asen lima arogotem nung tenzükba mapa lenisüba model ka dang küm noklangka tema amshia arur. Iba modelji pastor ka nem arogo nung tematiba menden agütsüba pastor ka kübok arogo mapa achaayangba ya lir. Laishiba nung nisung anana Yisu Osangtajung sayutsü yokba angur. Anungji Laishiba nung tenzükba aser tenzüktsü yokba otsü kar tamasa reprangshidi. Iba sülen Co-pastors ta asübaya kechi aser tangar lima koma inyaker item idang asenok den lemsatepba ajanga tangazükba aser temelenshi adoktsü imlar.

Tenzükba aser Tenzüktsü Yokba Indang Laishiba Nungi

Osangtajung sangdongba nung shilem tulu agiba apuani ka indang Tasen Lai nung zülua lir. Asenok aikati Priskila aser Akula na otsü ya angashir, saka züba-züba dang zünga, angar alitsü akok. Priskila aser Akula tena ya terok ben (T. Ken 18:2-3; 18:18; 18:26; Rom 16:3-4; I Korint 16:19; II Tim 4:19) Laishiba nung tenung teta zülü-a lir. Pezüben Priskila tenung mezüng zülua lir. Parputu shiba tongtibangba, pa/la tenung tama zülü ta ashir. Laishiba nung kinungbo tenung dangashi kinungtsübo tenung aiben zülü-a mangur. Tetsür tenung teta züluba Laishiba nung aikabo mali.

Kechiba Priskila tenung tama pezüben zülü, aji Laishiba nung rasa-a zülü-a mali. Saka tenung züluyim yaki tazünger nem angatetdaksünübaji, Priskila ya tasü tait, sempet aika aliba tetsür liasü. Pauli Priskila aser Akula naprongla pa den külem tenzükertem ta aja. Yamaji, Priskila aser Aquila tena teka amteper tanela anir aruba mapa inyak. Korint nung aliba arogo par kidang sentep. Yamajisa, Ephesus nung aliba arogo, Priskila aser Akula-er kidang sentep. Priskila aser Akulai Paul rongsen agi yariba dang masü, tenati Paul taküm asoshi parnok tekong tendaka timatem ta Rom 16:3-4 nung zülua lir.

Ano, Apoloi tsüngro songa Yisu indang tasü ita jembiba angashia, Priskila aser Akulai Apolo anir aru aser Kibuba tesayuba lemaning indang tali tejangjaba pa dang rateta sayu ta Tenyartem Mapa 18:24-26 nungji zülua lir. Anungji tenaprongla tesayur liasü ta Lai jaki jangjatsür.

Priskila aser Akula nati Yisu Khrista Osangtajung sangdongba mapa nung teka amteper shilem agiba angur. Tena kati ka akhümbanga, mesüra ka yimjak nung aser kabo tezülen nungi dang inyakba indang magur. Tenati kati ka nungeta, ka kümer Yisu Osangtajung sangdongba mapa nung tasü ita inyak. Priskila aser Akula na nükjidong ka dang liasü aser iba nükjidongji Tsüngremi Yisu Khrista ajanga nüburtem atema kechi inyak iba Osangtajung indang nüburtem nem metetdaksütsübaji liasü.

Yisu Khrista iba lima nung alidang mapa ajakji Pa kisüngi inyakteta liasü. Yisui mopung o tsüsem arütsü, aser mopung aser tsüsemi tashi anga (Matt 8:23-27). Pa tonga maoyonga Yisui o dang jembiba ajanga yim tanga ka nung shiranga alir anebtsü (Matt 8:5-13). Yamaji Yisui shinga teyari meteni Pa kisüngi inyakdi sürbo ajak kokteta liasü. Saka nisungi meyimlaba nüburtem Yisui aja aser parnoki pa sülen anitaka pai inyakba mapa ajia, angazükdaksü (on-the-job training/apprenticeship). Aser Osangtajung sangdongtsü Yisui parnok nüburtem dangi yok. Mark 6:7 nung Yisu nütsüngtem anana Osangtajung sangdongtsü yok ta zülua lir. Nütsüngtem kati ka ajongshitepba, metongshitepba, tongzüktepba tenzüktsü mechi parnok kija masü anana yok. Yisui, tetenzük nungi Osangtajung sangdongba mapa nung kija-i masü, kar den teka amteper külemi inyaktsüba sayuba angur. Iba tesayuba ama Osangtajung sangdongba mapa nung Paul aser Barnaba, Paul aser Silai külemi inyakba angur.

Tejen lai nung asenoki Mosa aser Aron na otsü kanga junga meteta lir. Mapa ka inyaktsü mechi Tsüngremi sempet balala aketba nübo ana amshi. Mosa kisüngi iba mapa mekoktet, ano Aron kisüngia iba mapaji mokoktet, saka tena lungjemer Yihuda nunger alar tia nungi anitet. Tsüngrem mapa inyaktsü ya nisung ka kija mapa ta masü, lemsatepba yaritepba inyakba angur.

Asen tsürabur denomination koba American Baptist Church USA (ABCUSA) lir iba denomination kübok Arogotem nung tetsür ordain süa Senior Pastor inyaktsü 1892 nungi tenzük. Aji dang masü ABCUSA Arogotem nung joko küm aika co-pastors inyakba dang masü arogo ka nung apuani kati küm 30 co-pastors inyakba lir. Iba amaji, alima tesem aika nung nisung kati dang senior pastor inyakba model melenshia aoba angur. Süra co-pastors ya kechi?

Co-Pastors ta asüba ya kechi?

Co-pastors tetezü Arogo tenzükba mapa nung lenisüba temaba jenjangji nisung ka nem dang masü, ana nem kasa agütsüba dang co-pastors ta ajar. Tetenzük nungbo co-pastoringji nisung anati dang inyaka tenzük. Tanübo nisung pezü mesüra pungu (4 to 5) co-pastors inyakba angur. Co-pastors tebur ana, asem, mesüra pezü jenjang ka dang ta sür inyaker. Ano tetsür ka tebur ka, mesüra tebur ka tetsür ana da inyaker. USA (tanga lima aika nung) nung tesabutiba-ji apuani (husband and wife) co-pastors jurabaji lir. Arogo aikati pastor bushidang apuanina prongla theology zünger sempet tajung aliba kibong ajurur. Anungji iba amala kibongji arogo atema temoatsü ta angateta anaprongla jenjang ka nung tenzüktsü ajar.

Co-Pastors jagi tetenzük nungi parnok nisung ana, asem, pezü, pungu süaka parnok ajak ola aser tashi (voice and authority) ka dang ta tangatetba nung tenzük. Tetezü, parnok rongnung shinga temaba mesüra tekübokba ta mali, ajak jenjang sako ta angateta tenzük. Co-Pastors ajak nem arogoi kasa tashi (equal authority) aser tenzüktsü ajaba khuret agütsür (equal responsibilities).

Aikati yamaji koda sür inyaktetsü ta bilema alitsü südi. Teinyakdangeri-ang co-pastors inyakyimjibo tajungba meteta alinung ni apuani co-pastors parnok 34 dangi survey ka yok. Parnok dang tasüingdangba item pezü ya asüingdanga liasü: (1) Co-Pastors inyakyim nung tenzükba maangka aser tetsükdaksü kechisa? (2) Co-Pastors tsüngda mapa kechi koda lemsa bener aor? (3) Co-Pastors tenzükba mapa nung arrtsü kechisa alatsü tim? (4) Co-Pastors aginür arogopurtem temetetsü kechisa? Parnok telangzüba nung ajemdaker asenok den item tongtibang inyakyim lemsateper.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilema ken-o ama tazünger angateta agitsü mepishir

Ministry kati Texas nung bendangertem nem Laishiba agütsütsü



Crete, Illinois nung aliba Bible League International headquarters noksa nung angur.

October 15, 2021: Alima tesem ajungalen Arogo lenirtem nem training agütsüba telok-evangelical Khristan ministry-i Dallas-Fort Worth, Texas area nung bendangertem nem Laishiba aser Khristan literature kaket meyirjang aika lema agütsütsü.

Crete, Illinois nung amenoka aliba Bible League International-i November 21 nü International Day of the Bible anogomong dak sendakba nung Texas yimti nung bendangertem nem Laishiba agütsütsü, ta metetdaksü.

Bible League International (BLI) regional training director, Harold Trujillo-i, kin balala aser lisopur telok balala den osangtajung lemsateptsü atema DFW metropolitan area ya kanga tongtubang tesem ka lir, ta ashi.

"Item ama teyari nungdaka alibapurtem, talisa linük balala nungi arua alirtem yaritsü aser Yisu Khrista metetdaksütsü atema Dallas ya tiyongtsü tesem ka kümogo," ta pai ashi. "Onok mission ji Laishiba

ajanga parnok den sendakteptsü aser local Arogotem amshitsü atema lir. Onoki local Arogotem nem training agütsür aser nungdakba oset balala agütsür," ta paisa metetdaksü.

Trujillo-i ashiba agi, BLI-i taintem nem Laishiba 500 shi agütsütsü aser tanurtem nem Easy-to-Read Version Laishiba agütsütsü. Parnokisa evangelistic materials 2,000 aser discipleship materials 2,400 shi agütsütsü.

BLI-i tongtibangsa Hispanic local Arogo ana- Centro Evangelistico Hispano Church, Mesquite aser IDD Life Fellowship en Español, Hurst den ayongteper inyaksü. Parnokisa November 11 aser November 13 anogotem nung training ayongzuka katsütsü.

Arogo ana den ayongteper inyakba dak sendakba nung Trujillo-i, iba ya tesendaktep yanglushiba aser tesendaktep taküm lidaksüba temaitsü lir, ta ashi.

Iba tesendaktep ya 2019 küm yanglua liasü ajisüaka

coronavirus wara aser iba wara anema tenokdangba balala aliba ajanga tesendaktep raksaa liasü.

"Parnok den tanaben tesendaktep yanglushitsü nükjidong nung onoki item Arogotem nung pastor tem den senden mena parnok nungdak balala asungdangba den külemi wara mapang nung Arogoi nungdakbatem metetpelaa liasü," ta Trujillo-i ashi.

"Ni ama parnok-a timbaka seminary-i ao. Seminary nung wara mapang Arogo yangertsü atema tesayuba magütsür," ta paisa ashi.

Trujillo-i, training aser outreach mapatemji International Day of the Bible anogomong den külemi tenjiteper, aser iba ya ajanga nisung aikati pei taküm nung Laishiba ya kanga tongtubang kümdaksütsü, ta ashi.

New American Economy indang study ka ajanga ashiba, Dallas-Fort Worth area nung bendanger million 1.46 shi lir aser ibaji yimti nütsüing shilem 20 shi lir.

ANOGO ABEN TSÜNGREM DEN

Iba amala mapang tang shidak lir

"Aser ibala ama mapang asoshi na chuba yimli jagi arua ali shibai metet?" Easther 4:14(b).

Otsü ajunga nung Bendanger tashi Yihuda kinji samatsütsü merang. Anitet mapang nungi, Hitler mapang tashi, tang mapang Iran, kintem aser yimsüsürtemi Tsüngremer nübür alima noksa nungi indoktsü meranger. Saka Tsüngremi Abraham dang nangzük (Lip. 12:2-3; 17:1-8). Kodang tekülak Hamani Yihuda nunger samatsütsü tasa tamajung agi chuba Ahasuerus mesüzük, Tsüngremi pa sentong tenzükadoker liasü. Inyakyim ka ajanga pai tebur tajung Yihuda nunger aiür ka chuba dangi anir aru, shibai la chubatsür kümdaksü. Kodang Yihuda nung samatsütsü tasa temai adok, Mordicai Esther dang tang mapa inyaksü ashi, pai la dang iba ama mapang ka asoshi Tsüngremi na anir arua alitsüa shibai metet.

Kasa ochiji ne dena lir. Tsüngremi iba ama mapang ka nung iba meta yagi anir arua alitsü. Nai ajurur den sendakteptsü Tsüngremi na renemtsür alitsü. Yisu osangtajung proktsü asoshi Tsüngremi na amshitsü akok. Bill Fay-i pa kaket, 'Hoe to share your faith without an argument' nung ashir, Tsüngremi lenmang aika amshitsü akok, nai O merepteti jembiba, na metsüdakba, nai shinüba Lai tekong kong lir mengutetba. Pai amshitsü makokbaji na ola matoki alibaji lir. Tsüngremi na "iba ama mapang asoshi" yanglu ta bilemtettang. Nai tanü Estheri inyakba ama kechi atalokdir atalokang inyaktettsü asü ?

Kibuba, tanü ni Ne osang tajung tasü itta sangdongtsü kü dang yariang. Amen.

England nung Khristan nurse kati hospital ka anema ken o benok

October 15, 2021: Nigeria tsür Khristan kati lai azükba Kangki azük agizüktsü memelungba mesüra miimbangtsü memelungba agi la inyakba hospital ketdangsertemi la mapa nungi anendaksüba sülen tawa lai iba hospital ji anema ken o benokogo.

Khristan nurse, Mary Onuoha ya 2002 küm nungi Thornton Heath, England nung aliba Croydon University Hospital nung inyaka aru, ajisüaka tesüiba küm ishika hospital ketdangsertemi la dang lai agiba Kangki azükji magitsüla mesüra miimbangtsüla, ta tuyua aru.

Mary Onuoha-i, "Iba ya kü tamangba yimsü anema inyakba lir. Tesüiba küm 40 tashi ni Kangki azük ya azüker. Iba ya kü shilem ka aser kü tamangba yimsü, ni kangki zük azükba ajanga shinga melung meyirutsü," ta ashi.

Onuoha'er adianu ka medical teyari junga manguba ajanga asüba sülen lai nurse training agia liasü aser 1988 küm la Nigeria nungi England-i oa medical field nung inyak.

La iba hospital nungji



inyakba mapang nung lai hon agi yangluba Kangki zükji azüka liasü saka hospital staff mesüra shiranger shingaia ibaji ashishia maru, ta lai ashi.

Mary Onuoha-i, "Shingranger aikati 'ni nü Kangki zükji nükshir' tasa ashi. Parnoki ibaji nükshiba ajanga ni pelaa liasü. Ni Kangki zük azükba atema nüma atanger, kechiyong Tsüngremi ni kanga meimer aser kü taküm alangzük ta ni metet," ta ashi.

Ajisüaka 2015 küm nungbo hospital ketdangsertemi la dang security nung ajemdaker Kangki zükji mazüktsüla mesüra tangari mangutsüsa azüktsüla ta tuyua liasü. Ajisüaka Onuoha-i ibaji memelung aser tangar nurse temia pei yimsü dak sendakba balala bentshia liasü.

"Iba hospital nung inyaker staff tem anogo shia mosque (Muslin nunger tekülem ki)-i pezüben aoer saka shingaia

parnok dang kecha mashir. Hindu nungeria parnok tekanük nung lisü temerem mesür aser Muslim tsürtemia hijabs agir. Ajisüaka kü tekong nung Kangki zük tilaka azükba nungji lendong lir ta parnoki züingshir, ibayongji ni mapa nungi anentsüsa aküm" ta lai ashi.

2018 küm surgery ka agiba mapang nunga hospital manager kati la dang Kangkiji agizükang mesüra mimbangang ta shia liasü, saka lai yamaji

meinyak.

Iba kümjisa la nurse mapa nungi agien aser jenjang tilaba-receptionist mapa agütsü. Hospital ketdangsertemi maneni la dang, nai Kangkiji magizükra mesüra memimbangra na anema bushisüngdangtsü ta tuyua liasü. Iba sülen 2020 küm June ita nung la nem kangshia stress leave agidaksü.

"Ni lanuwa mapang nungi ni nisungtem anepalua yarinüa liasü. Ibaji kü zü nung keta lir. Ni nurse ka künnüa liasü aser kü tamang jenjang chichia linü. Ni tashitait tetsür ka ajisüaka ozüing alema inyaker ka ama parnoki ni züingshiogo. Ni kü mapa meimer saka kü tamang jenjang ni kodanga mesendoktsü, aser iba linük nung tangar Khristantemia [National Health Service staff tem] pei tamang jenjang mesendoktsüla," ta lai ashi.

Taoba hopta Mary Onuoha-i Croydon Employment Tribunal dangi ao aser October 5 nü lai la mezüing inyakba hospital anema ken o benokogo.

UK religious liberty group, Christian Concern teloki la nungita ken o jembitsütsü.

OLONG PAITEP # 5967

| | | | | | | | | | | |
|----|----|---|----|----|----|----|---|--|----|----|
| 1 | | | 2 | | 3 | | 4 | | 5 | |
| 6 | | 7 | | | | | | | | |
| | | | | | 8 | | | | | |
| 9 | | | | 10 | | | | | | |
| | | | | | | 11 | | | | |
| | | | 12 | | | | | | | 13 |
| | 14 | | | | | | | | 15 | |
| | | | | | 16 | | | | | |
| | | | 17 | | | | | | | |
| | | | | | | | | | 18 | |
| 19 | | | | | | | | | | |

- | | | | |
|---|--|-------------------------------------|--|
| TIPLÉN | | LANGTSÜNGLEN | |
| 2. Teburtemi tejak nung awaba - (8) | | 1. Temejangdak - (6) | |
| 6. T _ _ _ em - (3) | | 3. Nisung ka mapa inyaksü nübo- (4) | |
| 8. Tzük ayudak - (3) | | 4. Azüntsü asoshi mejemba - (6) | |
| 9. Nüngdakba dang timba - (6) | | 5. Tesangwa agütsüba - (5) | |
| 11. Züina ao - (4) | | 7. Tila masü - (4) | |
| 12. Yangi tzü angur - (5) | | 10. Tebenjem tetsür chanu - (4) | |
| 14. Tangar dang nungi tali - (4) | | 11. Tekolak nung inok - (4) | |
| 16. Senyong masü - (6) | | 12. Tetsüngda - (6) | |
| 17. Oadokdi - (3) | | 13. Tangar inyakba ka inyak - (6) | |
| 18. Tzü tarok - (3) | | 14. Tim masü ta ashi - (5) | |
| 19. Yimtaklir aikati iba ya ki den külemi yanglusemer - (8) | | 15. Asalendong - (4) | |
| | | 16. Tanü dangtsü - (4) | |

OLONG PAITEP # 5966 TELANGZÜBA

- | | |
|---|---|
| TIPLÉN : | LANGTSÜNGLEN : |
| 1. Telok, 4. Aluru, 6. Ozüng, 8. Emk, 9. Kin, 10. Teti, 12. Süir, 13. Jen, 14. Ola, 16. Talak, 17. Mazük. | 1. Tenükjang, 2. Luden, 3. Kiochtsü, 5. Lenti, 7. Tajangzük, 11. Teronem, 12. Sempa, 13. Jahaz. |



Narola mashisa aküm, Sopangba dak mulung malemer, saka Alokbai indangindanga masüngdangteter...!!!

Alokba : Hai anak Sobang...Nai ozü jala Narola den jembishinu tera mazüi ka jembia naa...???

Sobang : Aya...Okok ni kodaser Narola den mashi-i jembitsü...Ni meima dang jembir nung koda.

Alokba : Anuk ...Memeimshi-i shiangjo...Nai Narola dak tim masüba mapa kar inyak asü... ???

Sobang : Aya...Okok ni kodaser Narola dak tim masüba mapa inyaksü aka ??? Yamai tejembi-jo.

Alokba : Anuk Sobang ...Ochishia shiangjong...Nai Narola dak teka sangshia sotak-a naa ...???

Sobang : Ayaa...!!! Oko na kechiba yamai jembir ??? Ni kodaser Narola dak teka sangshitsü ???

Alokba : Arrrrreeee...!!! Surabangla Narola temang mashisa akümba ya shiba mapa asütsü...???

Sobang : Ayaaa...!!! Oko ni tsübuba agi meshiteter ashi ... Narola kuna raksaogo... nai mulungra kuna linur ajaaa...Hiiii...hiiii...hiiii.

Alokba : Eeeessh...Na kechiba yakta mashi ... Okolai OK...ta dang shir lila-to... haaaa...haaa.

Lilir : L.Kika Pongener.

TANÜBO NAI LANGZÜANG

Q. 'Global Fintech Hackathon Series' dang kechi ajar?
 A. '1 - Sprint' 21 B. '1 - Sprint' 2
 C. '1 - Sprint' 21 D. '1 - Sprint' 1

(Taruba adok nung onoki langzüsü)

YASHI ADOK TELANGZÜBA : Indian Navy

AO OSHI ANGAZÜKDAK:
TANÜ ANGAZÜKTSÜBA OJANG

Lapi
 (n) tebur saka tetsür mesük, temulung tila (sissy)
 * Tebur lapi o lapi na kanga putepa medemer.

Lapijok
 (n) kanga tasü mait (coward)
 * Tabur aika liaka lapijok teimba asüba agi tongpang makok.



NAI-A YA METETTER MA



China nung akhi mapang süng agi yangluba ki tuluka indang tamendakdak (foundation) ngutet. Iba tamendakdak küm 4700 tejen asütsü ta archaeologists temi asadangteter aser Hunan province nung iba ya nguteta liasü. Jijiao Cheng Site, koba Hunan Province nung Neolithic city site ka lir, archaeologists temi iba tesem atuba mapang, süng agi yangluba kisüjensü oset tululu ngutet. "Archaeologists temi F63' indang süng tarensen agi asadangogo aser 2800 B.C aser 2700 B.C tsüngda yanglua liasü ta ngutet," ta iba excavation indang executive lennir Fan Xianjun-i ashi. 1998 küm nungi 'Hunan Provincial Institute of Cultural Relics and Archaeology' ajanga on-site investigations, mapping aser systematic archaeological drilling maparen balala achayanga inyaka arudar.

SUDOKU # 6008 TELANGZÜBA # 6007

| | | | | | | | | | | | | | | | | |
|---|---|---|---|---|---|---|---|---|---|---|---|---|---|---|---|---|
| 3 | | | 9 | 7 | 5 | | | 4 | 2 | 9 | 8 | 7 | 3 | 5 | 1 | 6 |
| | 4 | | | | | | 1 | 9 | | | | | | 3 | 5 | 6 |
| | | | | | | | | | | | 1 | 8 | 7 | 5 | 6 | 4 |
| 2 | | | | | | 3 | 6 | 7 | | | 5 | 9 | 4 | 3 | 2 | 8 |
| 6 | | | | 9 | | | | | | | 7 | 6 | 8 | 9 | 5 | 1 |
| | | | | | | 2 | | | | | 2 | 3 | 1 | 7 | 4 | 6 |
| | | 1 | 4 | | | | | | | | 6 | 1 | 2 | 4 | 9 | 7 |
| | 6 | | 7 | 3 | 8 | | | 5 | | | 9 | 7 | 3 | 1 | 8 | 5 |
| 7 | 9 | 8 | 5 | | | | 4 | | | | 8 | 4 | 5 | 6 | 3 | 2 |

OJANG LUTEP # 5553

| | | | | | | | |
|--------------|---|--------------------------|--------------------------|--------------------------|--------------------------|--------------------------|--------------------------|
| NGAATR | : | <input type="checkbox"/> |
| TAAEM | : | <input type="checkbox"/> |
| AJTNUG | : | <input type="checkbox"/> |
| SÜJEITBMBO | : | <input type="checkbox"/> |
| YTUÜRS | : | <input type="checkbox"/> |
| EIP | : | <input type="checkbox"/> |
| TGISAÜ | : | <input type="checkbox"/> |
| SÜTSAA | : | <input type="checkbox"/> |
| AHITKS | : | <input type="checkbox"/> |
| JMMTTEEEERBI | : | <input type="checkbox"/> |

OJANG LUTEP TELANGZÜBA # 5552

**PERIA DANG LIKA PEI ANG TEROKONGBA
 AMA TANGAR DANG SAYUR**

TAN HOPTA ATEMA - KOMA SÜLA ?

Q. Asenok arogotem nung tetsürtem nema sannükla dang masü saka sannükba mapa inyakdaksü nunga koma süla ?



October 15, 2021 nü New Delhi nung Singhu arrtsü nung Samyukt Kisan Morcha (SKM) lenir, Jagjit Singh Dallewal-i osangbenertem den jembiba noksa nung angur. Kasa noksa nung lenirtem- Balwant Singh (abelen) aser Ruldu Singh Mansa nata angur.

Global Hunger Index nung India ano jenjang tamajungba kümogo

New Delhi, October 14 (Agencies): Linük 116 nung asadanga Global Hunger Index (GHI) 2021 nung India jenjang ano tamajungba küma jenjang 101buba kümogo; 2020 küm iba Index nung India jenjang 94buba nung liasü saka tangbo 101buba kümogo aser ibaji kidanger linüktem- Pakistan, Bangladesh aser Nepal linüktem dang nungi tamajungba lir.

GHI 2021 nung linük tajungtiba 18 rongnung China, Brazil aser Kuwait linüktem densema lir, ta Global Hunger Index website ajanga metetdaksü.

Iba report ya Irish aid agency- Concern Worldwide aser German organisation Welt Hunger Hilfe nati yanglu, aser parnoki ashiba agi, India nung ayaba jenjang ya ano tamajungba kümogo.

India nung GHI score-a tamajungba küma 2000 küm 38.8

aliba nungi 2012 nungi 2021 küm tashi nung 28.8 - 27.5 kümogo. GHI score ya lenla pezü nung asadanger, aser itemji - chiyungtsü agi matuba; tanur ka dar den mesütep temang touzük ajemba, tanur ka küm den mesütep dar atsüba -rajang aser arrshi küm 5 majungdang tanur asüba rate densema lir.

"Nüburtem coronavirus agi mejungi kongshioago aser India nung wara dak sendakba tenokdangbatem ajanga alima nung child wasting rate tamajungtibaji India liasü," ta kasa report ajanga metetdaksü.

GHI ranking nung India kidanger linüktem- Nepal jenjang 76buba, Bangladesh jenjang 76buba, Myanmar jenjang 71buba aser Pakistan jenjang 92buba nung lir aser item linüka 'alarming' hunger category nung densema lir, saka India dang nungibo kanga tajungba.

Kasa report ajanga ashiba agi, alima nung ayaba tebilemstü anema raraba jenjang ano mejungi kümogo aser 2030 küm tashi nungbo alima nung talisa linük 47 bo jenjang kanga mejungi alitsü, ta GHI-i asadangtetogo.

Lenla aika nung food security jenjang mejungi lir; raraba, climate change dak sendakba nung tsüngsang-mopung tamajungba akümba, rongsenkettsüng aser coronavirus dak sendakba tayongzükbatem ajanga ayaba tebilemstü onük tamajungba akümer.

Item rongnung jagi tamajungtiba asemji C asem lir-Conflict, climate change aser COVID-19; item C 3 ya ajanga tesüiba küm ishika tsüngda ayaba anema raraba nung terenlok aliba jenjang raksatsütsü, ta kasa report ajanga metetdaksü.

Petrol aser Diesel jenjang maneni tuogo

New Delhi, Mongputeni/October 15 (Agencies): India nung ano petrol aser diesel jenjang maneni tuyuogo; totzü litre shia poisa 35 atu.

Totzü jenjang atuba sülen linük yimtiba, Delhi nung petrol litre ka nung sen 105.14 aser Mumbai nunga petrol litre ka nung sen 111.09 kümogo.

Linük rongsenetstüng yimtiba, Mumbai nung diesel litre ka nung sen 101.78 aser Delhi nunga diesel litre ka nung sen 93.87 kümogo.

Tanü agi anogo anabuba (October 14, 15) petrol aser litre shia poisa 35 atu. October 12 aser 13 na nungbo totzü jenjang metui liasü.

Linük tesem timbaka nung petrol litre nung sen 100 dak tema jungogo aser Madhya Pradesh, Rajasthan, Odisha, Andhra Pradesh, Telangana, Gujarat, Maharashtra, Chhattisgarh, Bihar, Kerala, Karnataka aser Leh densema state 12 shi nungbo diesel-a litre nung sen 100 jungogo.

Sonia Gandhi lenisüba nung tamang kateter: Navjot Singh Sidhu

New Delhi, Mongputeni/October 15 (Agencies): Punjab Congress Party Tir, Navjot Singh Sidhu-i Brihostibarnü AICC headquarters nung party lenirtem ajurua liasü, iba sülen osangbenertem den jembidang pai, Congress party Tir, Sonia Gandhi lenisüba nung pai tamang kanga kateter aser lai agiba telemtetbatem ajak agizüktetsü, ta ashi.

Party headquarters nung Sidhu-i AICC general secretary (organisation), KC Venugopal aser party general secretary incharge of Punjab affairs, Harish Rawat nung ajurua liasü.

Ghonda ka shi senden amenba sülen Sidhu-i, Gandhi

kibongi kechi telemtetba agidir agiaka ibaji party aser Punjab atema tajung asütsü, ta ashi.

Senden tembangba sülen osangbenertem den jembidang pai, "Ni kü tebilemstü onüktem party bangdak lenirtem den lemsatepogo aser Congress Tiri agiba telemtetbatem party aser Punjab atema tajung dang asütsü," ta ashi.

Rawat-ia, "Navjot Sidhu dang Punjab Congress Tir maneni inyaksü aser party tashi aittsü atema inyaksü asoshi tuyuogo," ta metetdaksü.

Tawa Sidhu-i Punjab Congress Tir menden nungi sodi meshiba shidi agütsü saka party bangdak lenirtemi tang tashi telemtetba magi.



Kolkata, October 15, 2021: Hokolbarnü Kolkata nung Durga Puja benjung tatembangbuba anogo nung Hindu nungertemi Ganga ayong nung Durga tsüngrem indokba noksa nung angur.

Haryana nung aluyimertem longkak aitba tesem anasa tasü mang ka angu

Chandigarh, October 15 (Agencies): Hokolbarnü Haryana nung Sonipat district kübok Kundli nung aluyimertem longkak aitba tesem anasa tasü mang ka angu, aser teka külenbo alandoker liasü, ta police-i metetdaksü.

Asürji arrshi küm 35 shi liasü aser tasü mangji Singhu arrtsülen insang agi yangluba

atsüka nung alener liasü, ta police-isa metetdaksü.

"Tanep 5:00 ako meta aluyimertem longkak aitba tesem anasa tasü mang ka anguba osangji Kundli police station nem metetdakja liasü," ta Sonipat nung police officer kati metetdaksü.

"Onoki ken o ka benokogo aser aibelenertem aputsü atema bushisüngdang

tenzü kogo," ta Inspector General of Police, Rohtak Range, Sandeep Khirwar-i metetdaksü.

Longkak aitba tesem anasa alirtem dang asüngdangyaogo; mejangjaba nisungtem anema ken o ka benokogo aser post mortem agitsü atema tasü mangji Sonipat civil hospital-i bener ogo, ta police officer-isa metetdaksü.

PMModi-i Defence Company tasen tenet tenzüksüogo

New Delhi, October 15 (Agencies): Vijaydashmi benjung anogo nung Ato kilonser, Narendra Modi-i defence company tenet tenzüksüogo.

Iba sentong nung jembidang pai, "Tarutsü tasen ka yangertsü atema India-i nükjidong yur inyaker. Tanübo defence sector nung inyakyim teladak kümogo aser tamang kateter," ta ashi.

"Aatmnirbhar bharat scheme kübok asen linük ya alima nung mitkar tashi tulutiba aliba linük kümdaktsütsü atema nükjidong yur inyaker," ta ashi.

"Linük nüchiso anguba sülen ordnance factories ajungkettsü aser technology tasen amshitsü nungdaka liasü saka temelung kangabo magütsü liasü," ta pai ashi.

Kasa sentong nung Defence Minister Rajnath Singh aser defence industry associations

nungi tongti ketdangsertem densema liasü.

"Linük nung defence terenemshiba tsütsü tangar dak memetaloktsü atema India sorkari department ka kübok Ordnance Factory Board nungi corporate entities tenet tentetsü lemteta liasü. Iba ya ajanga tashi tasen agütsütsü aser tasen apiteta yanglutsü," ta Minister's Office-i video ka ajanga metetdaksü.

Ordinance Factory Board nungi sen crore 65,000 item company tenet nem agütsüogo.

Defence company tenetji : Munitions India Limited (MIL); Armoured Vehicles Nigam Limited (AVANI); Advanced Weapons and Equipment India Limited (AWE India); Troop Comforts Limited (TCL); Yantra India Limited (YIL); India Optel Limited (IOL) aser Gliders India Limited (GIL) lir.



New Delhi, October 15, 2021: Hokolbarnü India nung Defence company tenet tenzü kba sentong nung Union Defence Minister, Rajnath Singh adenba noksa nung angur.

Durga Puja pandal amakertem bushia merenshitsu: Sheikh Hasina



Dhaka, Mongputeni/October 15 (Agencies): Bangladesh Ato Kilonser Sheikh Hasina-i, Chittagong division kübok Cumilla densema tesem balala nung Hindu nung tekülemdak aser Durga Puja amungba tesem amakertem nem osang tesashi ka agütsüogo aser iba tatalokba nung densema alirtem pua merenshitsu tenangzüka agütsüogo.

"Cumilla nung tatalokba kanga junga bushisügangdar. Shinga metoktsütsü. Kechi tamangba yimsü dak amanger südir süang shinga metoktsütsü. Parnok ajak bushia aotsü aser merenshitsu," ta lai Dhaka kübok Dhakeshwari National Temple nung Durga Puja sentong ka nung Hindu nungertem den benjung salem lemsatepba mapang ashi.

"Onoki osang aika bendendar. Tang ya technology putu ka lir aser iba tatalokba nung densema alirtem technology amshia kechi südir süaka bushitettsü," ta Hasina-i ashi.

Laisa, India dang kin balala tsüingda mangatettep adoktsü aliba meita atatsü mepeshia metetdaksüogo. "India nung kecha mataloktsü imlaa atar. Iba ajanga Bangladeshi nung tensa tamajungba akümtsü aser linük nung Hindu nungertem akoksatsü," ta lai ashi.

Bangladesh nung Durga Puja amungba mapang Hindu

nung tekülemdak kar raksatsü aser nisung pezü tashi tepseta liasü. Iba ajanga sorkari azütokshiba prokshia aoba nokdangtsü atema Brehostibarnü district 22-i paramilitary force yokogo.

Bodhbarnü Cumilla den aartsü nung Hajiganj sub-district kübok Chandpur nung mangatettep adokba sülen nisung asem tepset aser lendong nung yiruru ka mapang tatsüka lir asü. Police-ia, iba lendong nung nisung ana kanga mejungi yirur lir, ta metetdaksüogo. Parnokisa, mepetmesü nung densema alirtem police ketdangsurtem maka yirutsü, ta ashi.

Pandal ka nung Durga indang süngyanglu ka tetsüing nung Quran ka yua lir ta olulu osang prokshiba sülen October 13 nung Cumilla kübok mandaps, pandals aser hindu nung tekülemdak amakertem tenzük. Maneni Noakhali, Chandpur, Cox's Bazaar, Chattogram, Chapainawabganj, Pabna, Moulvibazara aser Kurigram nunga pandal tem amakba osang agütsüogo.

Ketdangsurtemisa ashiba agi, mepetmesü adokba nokdangtsü atema administrative districts 64 nungi 22 nüka atatsü Border Guards Bangladesh (BGB) den külemi elite anti-crime Rapid Action Battalion (RAB) aser armed police tem nem tetuyuba

agütsüogo. Ketdangsurtemi Haziganj nung rally ayongzüka magitsü tenokdangba agütsüogo, kong nisung pezü tepseta liasü. Parnoki tasüba kuli magütsü, saka media osang balala ajanga ashiba agi, police temi nisung 500 shi adenshir alidak injang khaloktsü.

"Ken o bushisügangdar tenzükogo aser security camera footage amshia onoki aibelena alirtem jangjatsü merangdar," ta police indang deputy inspector general Anwar Hossain-i Cumilla nung osang benertem dang ashi, ta PTI sangdong ka ajanga metetdaksü.

Bangladesh indang religious affairs ministry-i nüburtem dang temzüng ozüing parnok mulungka nung mamshitsu mepeshia metetdaksüba den kin o kin tsüingda yimjung aser tesunep nung alitsü atema inyakteptsü ayongzüko.

Kasa mapang nung Hindu nung tamangba yimsü lenirtemi Durga Puja benjungmung meinprongtsü atema tasa asaba nung shilem ka ama iba lendong atalokogo, ta ashiba den aibelena alirtem anema jenjang tapet agitsü aser parnok tekülemdak aser kiojen tem kümzüka toktsütsü khangogo.

Brehostibarnü India-ia, iba tatalokba dak sendakba nung Bangladesh den tongtepratepogo aser kidanger linüki tensa azüoktsü atema jenjang tapet agiogo, ta ashi. "Bangladesh nung sorkar teyari aser nüburtem timba ka teyari nung Durga Puja benjung maneni mungdar, ta angateter," ta external affairs ministry spokesperson Arindam Bagchi-i ashi.

Bangladesh nung pandals 3000 dak tema amenoker Durga Puja benjung mungdar. Bangladesh nung nütsünyongsük million 169 aliba nungi shilem 10 Hindu nung lir. Kümtem tsüingda social media nung olulu osang prokshiba ajanga mepetmesü adokba aika ajangashia arudar.



Ain el-Remaneh: Beirut, Lebanon kübok Ain el-Remaneh tesem nung 1975-90 tashi Muslim Shiite aser Christian na tsüingda civil war adokba tesem nung mangatettep tulu adokba sülen Lebanese army soldiers temi iba tesem meita ataba noksa nung angur. Telungpurtem tsüingda khatempa nisung trok tashi asüba sülen Lebanon nung Hokolbarnü School, bank aser government office tem shibanga liasü.

Kandahar mosque nung asür 32 jungogo

Kabul, Mongputeni/October 15 (Agencies): Afghanistan kübok Kunduz yimti nung Shiite mosque ka pei temang nung bomb sendakloker pokdaksürtemi amakba sülen Hokolbarnü Kandahar yimti nunga sarasadem mapang bomb pokdakja liasü, ta new agency balalai metetdaksüogo.

Mozüki ka indang otongdar kati AFP dang ashiba agi, Shiite nung indang mosque ka nung bomb pokdaksüba sülen nisung 32 asü aser nisung 53 yirua liasü.

"Tang tashi nung onok mozüki-i nisung tasüing 32 aser yirur alir nisung 53 bener aruogo," ta mozüki nungi osang agütsüba AFP sangdong ka ajanga metetdaksü.

Kandahar kübok Imam Bargah mosque nung Hokolbarnü nisung aika adenshia sarasademba mapang iba lendong atalok asü nung tasüba aika akümtsü ta tsübua bilemer.

Local osangbenertem social media nung lemsatepba video

aser noksatem nung tasüing aser kanga mejungi yirur alirtem atem nung mepidaka aliba sayuogo.

Kasa mapang nung interior ministry atema Taliban otongdar kati, iba lendong dak sendakba nung osang tejangja agitsü merangdar, ta ashiba Reuters-i metetdaksü.

Iba lendong atalokdaksüba atema tang tashi nung telok kati danga nangzüka mali, ajisüaka Islamic State puri Sunni nungertem amokbaner aliba linük nung nütsünyongsük agi ajema aliba Shiite Muslims nungertem maka arudar.

Afghanistan nungi US aser Nato sepaitem mainshi tsüingda Taliban-i linük nung lokti ajak tekümsükba kübok toktsütsü tenangzüka agütsügi. Ajisüaka Taliban-i sorkar atsüingba sülen ISIS den sendaka aliba Islamic State Khorasan-i lendong tali bener arutsüdar. Taliban tsükchir ISIS-K purisa August ita Kabul airport nung US sepa 13 aser civilian tem aika tepseta liasü.

South Africa nung tanurtem nem vaccine agütsütsü

Cape Town, Mongputeni/October 15 (Agencies): South Africa nung tanur arishi küm 12 aser 17 tsüingda alirtem nem taruba hopta nungi Pfizer vaccine agütsütsü, ta health minister-i Hokolbarnü metetdaksüogo. Taküm final tatidang magütsü tsüingda tanurtem nem vaccine agütsütsü atema iba jenjang agiogo.

August ita sorkari Covid-19 vaccine agütsü tenzükba sülen South Africa nungertem noklang aika adenshia vaccine agiogo. December tashi nung nütsünyongsük shilem 70 nembo vaccine agütsür alitsü sorkar sentong lir.

"EVDS (electronic vaccination data system) registration system aser tanga inyakyim dak sendakba nung tenüngdakba maparen renemshitsu atema iba mapa ya October 20 nü tenzüktsü," ta Health Minister Joe Phaahla-i ashi.

Taoba ita South Africa indang health regulator-i, tanur arishi küm 12 nungi temapurtem nem Pfizer vaccine agütsütsü temelaba agüja liasü.

Ajisüaka Phaahla-i, vaccine advisory committee tetuyuba nung tanurtem nem Pfizer indang vaccine ya dose ana melena ka dang agütsütsü, kechiyong iba ajanga parnok temulungjang nung kongshitsu akok, ta ashi.

Paisa, sorkari lendongbang nung aliba health care workers, shirnok nem ita ti tejangdang J&J vaccine agütsüogo, parnok nem booster shot ka agütsütsü asadangdar, ta ashi.

Linük nung Medical Research Council-i, health regulator dang health workers tem immunity akangshitsu atema J&J booster shot agütsütsü atema agizüktsü benokogo.

"Iba osang atema onok ataa alitsü," ta Phaahla-i ashi.



Kongsberg, Norway kübok Stortorvet nung nisung ka lasang amshia amakba lendong nung asürtem atema lanurtemi naro aser shimo milen toktsüba noksa nung angur. Norway kübok jilatila ka nung nisung kati lasang amshia nisung pongu tepset aser nisung asem yiruja liasü. Aija alisang yagi pai nisung tepsetba nangzüko anungji pa okadak menokdaksü.

PELABA LEMSATEPER



Aso
22.08.1971

Asü
07.10.2021

"Kibubaji kü tesangwa aser kü tekümtet lir..."
Tenüngsang Ken 27

Asür **THONGDE IMLONG** shiranga aliba mapang nungi asü pila sendong anogo tashi kija kibong aser lokti balalai ozü asükhunung mapang agüja nübu shisatsü aser ali rongsen den sarasadem agi nungeta yaritepa aruogo, nenok ajak dang kangasa pelaba iba osang kaket ajanga lemsateper.

Nenok temiem mapa tajung asoshi asen Tsüngremi lepa moajang ta ozü tamang sarasadem.

Temiem Jala, Tsürabur, Kidang Kimang.

--- Tepela Tasoba Anogo ---

Tenüng : **Bongli**
Tasoba : 15 Oct 2018
Küm : 3
Talidak : Nepali kashiram
Jabaso Bongbong küm 3 asem tashi Tsüngremi arishi moatsü nung Pa tanüng asanger asen teyanglur Tsüngremi ano anema aliba den arishi talang moajangta onoki sarasademtsür.



~ Temiem Oba, Oja & Kinungertem.

Tenüng : **Ms. ImlienAochenlar**
Küm : 5 years
Tasoba : 15 Oct. 2021
Talidak : Mokokchung
Tsüngrem taochi ajanga jala küm 5 ajungba anogo tashi taküm tajung moatsü nung Pa tenüngsanga maneni taküm, arishi, aser shisatsü moajang ta sarasademtsür.



Happy Birthday

~ Aba & Ama

Tenüng : **Tianungit Jamir**
Tasoba : 16 Oct. 2020
Küm : 1
Talidak : Changtongya
Na küm ka tashi anir aruba asoshi Tsüngrem nem tenüngsang agütsür. Tsüngremi na maneni moajangma.



~ Temiem Otsü, Oba, Oja aser Kinungertem.

LOST NOTICE

I, Menanglepzük, am applying for a duplicate copy of HSLC and HSSLC Marksheet as I have lost it.

Name : Menanglepzük
DoB : 20/03/1992
F/Name : Sangtemtsulak
M/Name : Yangerlemla
HSLC Roll No : 0830348
HSLC Roll No : 1137006

Security Forces-i temesepba mozü shibelener ana apu

Kohima, Mongputeni/ October 15, 2021 (TYO): Hombarnü (11.10.2021) Security Forces den Police longjemer general area, Kohima gate nung temesepba mozü shibelener ana apu, ta sangdong ajanga metetdaksü.

Osang tejangja ka nung ajemdaker, Security Forces den State police longjemer Kohima gate mita ataba mapang, temesepba mozü shibelener nisung ana ya apu aser tena ket nungi sen lakh 40 alang Ganja (Marijuana) seret 100 aser

Maruti Van ka ngutet. Iba maparen dak sendakba nung maneni bushisüngdangtsü atema, pua alir anaprongla aser tena ket nungi ngutetba oset ajak North Police Station Kohima nung agütsüogo.

Maneni, Mongolbarnü (12.10.2021) Security Forces den Police longjemer Jharnapani, Dimapur kübok general area nung temesepba mozü shibelener nisung ana apu.

Osang tejangja ka nung ajemdaker, Security Forces den State police longjemer Jharnapani

general area mita aoba mapang, temesepba mozü shibelener ana ya apu aser tena ket nungi capsule 3, sapon case 8 nung sen lakh 4 alang brown sugar gram 130 (130 gm each), sen lakh 36 alang IMFL bottle 5464 aser sen 33,870/- shi ngutet.

Iba maparen dak sendakba nung maneni bushisüngdangtsü atema, pua alir ana aser tena ket nungi ngutetba sen aser oset ajak Medziphema Police Station, Dimapur District nung agütsüogo, ta kasa sangdong ajanga metetdaksü.

Ray Luzier dak Covid-19 putet

Mongputeni/October 15, 2021 (Agencies): America nungi metal band - Korn indang drummer, Ray Luzier dak COVID-19 positive putet.

Iba band nung züngsem asem tashi Covid-19 puteter asütsü aser band-i ashiba agi, Ray (Drummer) mali nunga, renemba ama tour sentong ajak agitsü ta osang jangjatsüogo; aser aruya aliba show tem atema Ray melen drummer tanga ka shimtsü, ta band-i ashi.

Social media sabang nung, "Tia makai Ray dak COVID positive putet aser Vegas, Fresno, aser Oakland tesem nung agitsü aliba show asem tashi nung pai shilem magitetsü. Item mepetmesü liaka, sentong renemba ama Korn-i show tem tamakok maludaktsütsü.

"Iba timtem nungi Ray yakta taneptsü angutsü imlaa atar

aser pa iba wara nungi taneptsü ngura Los Angeles show nung pai onok den tanaben külemi shilem agitetsü," ta band-i ashi.

Taküm tsüklawa mongpu mapang, iba band nungi kentener Jonathan Davis dak Covid-19 positive puteta liasü. Iba timtem ajanga band-i show kar anogo atsülangtsüsa aküm.

"Jonathan dak positive putetba ajanga, taruba show kar anogo melenshitsüsa akümer. Iba show nung shilem agir ajak, Covid nungi kümzüka ayutsü asoshi onoki tama inyaker, ajiasünung show kar atema anogo/mapang melenshitsü telemtetba agir. Jonathan-i iba show nung shilem agitsü kanga yongyar aser tangbo pa tejungtuba lir," ta August ita band sangdong ka ajanga metetdaksü.

Ano, külem band nung

guitarist James 'Munky' Shaffer dak iba tashidak puteta liasü aser mapang tatsüka atema James melen, J.R. Bareis aniok. Taoba mapang, J.R. Bareis-i Korn guitarist Brian 'Head' Welch indang 'Love and Death' project nung külemi inyakogo.

Shamatore nung 'World Students Day' mungogo

Dimapur, Mongputeni/ October 15, 2021 (TYO): Hokolbarnü, HQ IGAR North kübok Assam Rifles indang Shamatore Battalion-i Shamatore Town, Tuensang District nung 'World Students Day' aser awareness lecture sentong ayonga agiogo. Iba anogomung nungtem nung, Assam Rifles-i Armed Forces dak sendakba mapa maongka balala nung ajemdaker lecture ayongzük, ta sangdong ajanga metetdaksü.

'Azadi Ka Amrit Mahotsava'

Security Forces-i Athibung nung Handloom Craft Centre ka lapoktsüogo



Dimapur, Mongputeni/ October 15, 2021 (TYO): Hokolbarnü, IGAR (North) kübok Assam Rifles indang Jalukie Battalion-i Athibung, Peren District nung Handloom Craft Centre tasen ka lapoktsüogo. Op Sadbhavna mapatong kübok iba Centre lapokja liasü, ta sangdong ajanga metetdaksü.

Lisopurtem temi pei teka mapa (handicrafts aser handloom) sayutsü asoshi iba Handloom Craft Centre ajanga parnok nungitta yaritsü. Iba den külemi Athibung meküta aliba

tanga tesem nungi aruagi iba Centre nung inyaktsü asoshi maongka lapoktsür.

Iba Handloom centre ya lisopur aser Civil Administration matsüngdang Athibung Regional Club nem agütsü. Nübur ajungtsü asoshi bilemja iba project mapa küma inyakba atema, lisopurtem aser Civil Administration temi Assam Rifles dang pelaba metetdaksü. Iba den külemi, linük asoshi bendanga agütsür inyakba atema, Head GB-i security forces dang pelaba metetdakja liasü.

Shamatore nung 'World Students Day' mungogo

mapatong shilem ama, iba sentong ayongzük liasü, kong Shamator Town nung 'Yimkhiung Akheri Arihako' den longjemer lanurtem aser kaketshir tsüngda Armed Forces indang metetta lidaktsütsü nükjidong yur iba sentong agiogo.

Iba lecture sentong nung lanurtem dang defence force inyakym, entrance/examination balala, qualification/age nung temsüa alirtem aser examination atema apply asütsü yimyatem, training, pay/ privileges/facility aser maongka balala indang tongmelang agi metetdaksü. Team aser kaketshirtem sensaksemba mapang, parnok dang Sainik School admission atema online recruitment aser registration inyakym den külemi Armed forces aser CAPFs, indang physical aser written exam ajangettsü; aser Sainik school entrance examination atema Assam Rifles-i jelia training agütsüba maparen indang metetdakja liasü, ta kasa sangdong nung shia lir.

Naga nunger football meimer ka süogo



Nüngtugu football asayar Temjen Naga tasü mang süngden pai sayutetba football asayartemi tetushi agüja leperi bener aoba noksa nung angur . Dimapur, Oct. 15,2021.

Dimapur, October 15 (TYO)

Naga nunger football asayar lanurtem rongnung nüngtugu asayar Wb.Aotemjen Kibang Jamir mapang tatsüka temang mejungi arur yashi Yangtepnü (Thursday) nü Dimapur nung süogo.

Pa arishi küm 46 nung pa kinungtsü den jabaso ka toktsür alima nungi pilar. Pa ya Chuchuyimpang nunger aser Sainik School, Imphal; Kohima Science College aser Ramjas College Delhi nung züngtetba lanur tajung ka liasü. Pa school

azüngba mapang Subroto Mukherjee Cup football asayamong nung asaya tenzük aser linük nung nüngtugu football club-tem rongnung East Bengal, Tollygunge, Sporting de Goa, Mohammedan aser Mohun Bagan tenü nung shilem tajung agia asayar tajung ka liasü. Pa ya mapang kabo Asian Football Confederation Cup asayamong nunga asayar ka liasü. Pa bendanglen football asayamong tapu balala nung asayadang, pai pa tenüngji Temjen Naga ta dang amshi, iba jagi tangari pa dang Naga ta dang jaa liasü.

Nagaland nunga pai Nagaland Premier League nung Doyang Football Club nung Coach cum Manager liasü aser pa CASE FC nung Coach inyaka lia ajungbena pa alima nungi pilaa ogo.

Tanü Dimapur nung par kidang Dimapur Ao Baptist Arogoi ketdangüsü agiba asü pila sentep nung OBASSI aser pai sayuba football club nung asayartemi aküm agüja asüpila o jembi aser parnokisa pa mang leper tashi meinoktsü.

Nagaland-i SACCC aser SAAF Cross Country Championship ayongzüktsü



Kohima, Mongputeni/ October 15, 2021 (TYO): Sangküm January 2022 ita Kohima, Nagaland nung South Asian Cross Country Championship 2022

ayongzüktsü. Hokolbarnü, RCEMPA, Jotsoma nung press conference ka agiba mapang, Athletic Federation of India (AFI) indang Associate Vice President aser Nagaland Athletics Association, President, Abu Metha-i iba osang sangokja liasü, ta sangdong ajanga metetdaksü.

India-i South Asian Cross Country Championship (SACCC) 2022 ayongzüktsü renemdar asünung, SACCC 2022 ayongzüktsü asoshi AFI-i Nagaland lemküktsüogo, ta Metha-i metetdaksü.

State nung ayongba asayamong rongnung iba International asayamong tulutiba asütsü. Nagaland kübok iba Championship nung shilem agitsü atema South Asian linük balala nungi athlete, ketdangür aser tongtibang nübutem longjemtsü, ta Metha-i ashi.

Metha-i, Chief Minister, Nagaland, Neiphu Rio teyari agia AFI dang iba Championship ayongzüktsü atema bid süa liasü, ta ashi.

Iba championship bid asütsü atema saisapong tentet, Nagaland Athletics Association aser Nagaland Athletics Federation nem maongka tulu agütsüba aser iba asayamong mapang State Sorkari teyari agütsütsü nangzükba atema, Metha-i CM Rio dang pelaba metetdaksü.

Iba asayamong takok ngua agitsü asoshi saisapong tentet aser nübur ajak dang nungitta yaritsü asoshi Metha-i ayongzük.

Metha-i, iba Championship mapang Kohima nung South Asian Athletics Federation senden ka amentsü aser 56buba National Cross Country Championship ya SACCC 2022 den ka küma longjemtsü, ta metetdaksü.

Taruba hopta nungi Kohima nung, coach aser technical ketdangürtem atema AFI-i 'special training aser

workshops' sentong ayongzüktsü terenemba lir. Iba training aser capacity building ya AFI indang Head Coach aser Tokyo Olympics nung Team India (Athletics) indang Head Coach, P. Radhakrishnan Nair-i anir agitsü, ta Metha-i shisem.

Maneni, Nagaland-isa sangküm January 15, 2022 nü, Kohima nung South Asian Athletic Federation (SAAF) Cross Country Championship ayongzüktsü terenemba lir.

Hokolbarnü, press conference ka agiba mapang, Nagaland Athletic Association (NAA) President Abu Metha, shiba Athletic Federation of India (AFI) indang vice president lir, pai ashiba agi, State nung ayongba International asayamong tulutiba den külemi January 15 nü 56buba National Cross Country Race ayongzüktsü terenemba lir.

Chief Minister Neiphu Rio teyari agia NAA ajanga SAAF Cross Country championship ayongzüktsü bid asütsü maongka angu, ta pai metetdaksü. Iba Championship ayongzüktsü NAA nem maongka agütsüba aser State Sorkar ajanga nungitta yaritsü nangzükba atema, Metha-i CM Rio dang pelaba metetdaksü.

Iba asayamong (SAAF Cross Country championship) takok ngua ayongzüktsü asoshi Naga nunger aser State nung saisapong tentet ajak dang amalitepa inyaksü asoshi pai mepishiogo.

NSF Martyrs Memorial Trophy:

Kitsuobozou, Mhakenyi Krou aser 12 Tribe United nungeri takok nguogo



Kohima, Mongputeni/October 15, 2021: Hokolbarnü, 21buba NSF Martyrs Memorial Trophy asayamong nung '12 Tribes United' aser 'Chedema United' tsüngda asayaba mapang tangokba noksa ka yangi angur.

Kohima, Mongputeni/ October 15, 2021 (TYO): Indira Gandhi Stadium kübok asaya aliba 21st NSF Martyrs' Memorial asayamong troknübuba nung Kitsubozou Youth Society, Mhakenyi Krou Football Club aser Twelve Tribe United FC nungeri pei pei tata asaya kokogo.

Hokolbarnü, mezüng match nung, Kitsubuzou YS-i Gorillaz FC madak 2-1 agi takok angu. Nusezo Kezo-i Kitsubuzou YS atema goal ana inoktsü aser Gorillaz FC atema Vikeduolie Ambros-i goal ka idaktsü.

Tanabuba match nung, Mhakenyi Kro-U FC-i Titans FC madak goal 2-1 agi kokogo. Nosal Pucho-i Titans FC atema mezüng goal idaktsü, saka Mhakenyi Kro-U atema Yanshalo Kemp-i goal ana tashi atonga inokja iba asaya takok angu.

Kasa asayamong tasembuba match nung, 12 Tribes United-i

goal 3-2 agi Chedema United kokogo. 12 Tribes atema Nahugom-i goal ana idaktsü aser Nyeiyang-i külem team atema goal tasembuba bendenloktsü. Chedema United atema Neikedozo aser Keneisezo nati goal ka ka inoktsü.

Maneni, Brestibarnü (14.10.2021) Head Hunters puri Phezou SC Tsiesema madak goal 11-1 agi takok angu. Kasa anogo, United Falcon Medziphema-i goal 4-0 agi United Brothers FC tsükdaktsü aser Mele FC aser Highlander's FC na goal 1-1 draw nung tembangba sülen, tie-breaker ajanga Mele FC-Highlander's FC madak goal 4-2 agi takok nguogo.

* **Honibar (16.10.2021)**

atema asaya yamai alitsü:

1. FIFA FC vs PANTHER FC @ 11:30 AM
2. Patron FC vs ANTA @ 1:00 PM
3. A. Yhome FC vs Youngsters FC Zhavame @ 2:30 Pm

Indian Wells: Rohan aser Denis na tsükogo

Indian Wells, Mongputeni/ October 15, 2021 (Agencies): ATP Indian Wells Masters asayamong tebur tarep quarterfinals nung India nunger tennis asayar tejen Rohan Bopanna aser pa den külem asayar Canada nunger Denis Shapovalov na tsükogo.

Tebur tarep quarter final asaya nung, Bopanna aser Shapovalov nati 4-6, 4-6 agi Russia nunger tarep Andrey Rublev aser Aslan Karatsev na makok.

Quarter final tongtetsü atema, taoba round nung Indo-Canadian tarep nati Germany nunger Jan-Lennard Struff aser Olympic gold medal angur Alexander Zverev na straight sets nung tsükdaktsü.

Taoba ita, US Open asayamong nung Bopanna-i Croatia nunger Ivan Dodig den

longjemer asaya liasü, saka tasembuba round nung tena tsükadok

Arishi küm, 41 tain Bopanna-i külem India team den Davis Cup asayamong nung shilem agia liasü. Iba asayamong nung India team-i 1-3 agi Finland makok. Bopanna-i Divij Sharan den külemi asayatsü melen, pai Ramkumar Ramanathan den longjemer asaya liasü aser tebur tarep nung tena 6-7(2) 6-7(2) agi Henri Kontinen aser Harri Heliovaara na makok. Iba asaya ghonda ka ser minute 38 nung tembang.

India team 0-2 agi Finland tesülen lia, tie nung asayatsü asoshi tarep asaya nung India team-i takok nüngdaka liasü. Prajnesh-i 6-3 7-5 agi Patrik Niklas-Salminen tsükdaktsü aser pungobuba match masaya.

BILEMDANGANG

"Temoatsü mesüra timtem arutsü mapang temaitsü karbo ngur atar."